

四庫全書

集部

欽定四庫全書

集部

弇州續稿卷二十五至
二十七

詳校官編修臣潘庭筠

中書臣劉源溥覆勘

總校官進士臣楊懋珩

校對官庶吉士臣何思鈞

謄錄監生臣茹灃

欽定四庫全書

弇州續稿卷二十五

明 王世貞 撰

詩部

七言絕句

王山人承父赴顧益卿中丞之約道經錫山詣陳
穉登言別陳為叙出塞之艱涕泗不已承父愀
然返棹作四絕句記之余屬和焉

一曲陽關淚黯然出門旋作剡溪船似憐思婦流黃淚
難向遼陽夢裏傳

其二

白狼河北捷書聞獵火千山上屬雲幕府饒歌知自草
祇無王粲和從軍

其三

李廣封侯數不奇欲翻遼海洗臙脂班生未上青油幕
誰勒燕然第二碑

其四

縱然雙足畏紅塵那便菰蘆老此身
見說暨無間頂色待君新句鬪嶙峋

為俞子贈醫朱壽甫

肘後青囊也自奇一膏肓起一刀圭
豎儒那有隋珠報祇乞王郎七字詩

朱大夫見貽古鼎辭之而侑以一絕句

博山青裊篆烟孤未論酬君值有無
從向匡廬躡雲氣

肯從人世覓香爐

戲題蘄尚祠

不知前後表何因
袁盎名僧蘄尚神
翻恨佛門開憾悔
到來京洛有讒臣

白乳泉

沸泉迎日似明璣
穿破雲根乳自肥
何似世尊將作供
不教新犢雪山饑

品外泉

張陸真成足跡踈譜中泉味未應如園林百果登科盡
荔子纔將首寄居

中貴人致牡丹一株頗麗雨中對之悵然停飲因
寄仲氏敬美

金陵汝醉牡丹下余亦故園呼一尊今年花發原無異
我向金陵汝故園

其二

綠跗紅萼兩鄉同峭冷狂霖一慨中留得洛陽培土法

明年並蒂賞東風

其二

亦知春事易闌殘
思到鵲原淚不乾
却恨蒼頭供卯酒
誰家白屋有晨餐

捨身臺

般若何曾有此因
如來偶醒戀身人
黃金臺上高千尺
天下誰人不捨身

獻花巖

自從偷破信師緘百卉雖繁鳥不銜無奈兒孫誹祖失
至今猶號獻花巖

懶融洞

雪裏垂垂長白蓮不言不起更悠然汝家初祖曾何道
翻結神天有漏緣

宗人光祿華松鴻臚王繼山邀余於王貢士園看
牡丹後復同光祿看芍藥戲成一絕

坐深那論主和賓總是烏衣巷裏人差勝紅丹與白藥

一般花蒂兩番春

牡丹為芍藥所接而前後花故云

金陵人家門多種樹樹頭巢鳥噪不止甚厭之戲

為一絕

吳門舊曲厭烏栖又聽長干烏夜啼丈人屋頭有何好
不如清曉汝南雞

戊子初中夏金陵祈晴祈雨者各一而大宗伯姜
公主之應因呈公一絕

禾田宜雨麥宜晴前後青泥叩玉清姜氏重瞻灌壇令

秣陵初遇東長生

大宗伯姜公倡諸公祈雨澍應偶成一絕奉覽蒙
賜疊四章不揣鄙陋輒依韻補上忘其續貂恐
蹈蛇足不知羣公能遂翕如成此勝事否

欲將祈雨續祈晴日日雲璫禮上清自是天公在方寸
占風莫問管先生

其二

擬攀真宰叩陰晴祗仗清卿徹底清一望秣陵黃土色

不知新綠為誰生

其三

村村抱耒怨天晴無奈鍾山氣轉清可為乖龍眠欲醒
千江鱗甲片時生

余自三月朔抵留任于今百三十日矣中間所見
所聞有可憂可憫可悲可恨者信筆便成二十
絕句至於適意之作十不能一亦見區區一段
心緒况味耳

仲春初旬辭故林鮮腴盧胡直至今一片真心終自見
不從兒輩覓知音

其二

啼餓哭死徧長干唯有烏鳶意覺寬山色江聲空自好
不如聾瞽任春殘

其三

殘年故國已無秋頗解民憂與國憂今日憂來渾不減
更添慚愧到心頭

其四

老去心情百不宜
未甘清影坐成移
雖然書卷衰無味
差勝敲碁捲白時

其五

散衙微緩日初西
稚子能勤進肉糜
西去街頭三五步
不知烟火幾家齊

其六

學道頻年懶未成
偶將身世付流萍
縱教自勘應難答

出愛微官處愛名

其七

侯門猶自鬪豪華一宴中人產一家
馬食鷄衣它日事銀罌翠釜片時誇

其八

紅女機裁供奉稀外家無復恃恩私
江東父老聊須活此是堯湯水旱時

其九

麒麟感起帶圍頰琬琰連旌二相名莫恠君王重調燮
近來暘雨較分明

其十

長夏轅門解甲時輕衫十萬羽林兒不知一半耕農死
飽飯城頭日日嬉

其十一

總為天王德意真傾家多作賑饑人兩都多少黃金穴
不救區區白屋貧

其十二

殘妻病弟三貧息刺促家音奈我何
六十三年牙齒落此生垂盡亦從它

其十三

五湖小冠如饑禽一疏輕搖朝野心
但使使君能信賞何愁豎子不成擒

其十四

五侯池館只如常千騎傳呵也不妨
恬澹揔來才二字

可教容易便相忘

其十五

書來病弟已加餐
離緒千頭且暫寬
便是天恩賜休沐
可能同覓少年歡

其十六

少年才氣頗縱橫
來問衰翁與借名
他日名成君自悔
祇將牙頰送餘生

其十七

數拳頑石點庭臯蔓草踈花遶四遭似與搶榆減歸念
弇中終自有逍遙

其十八

超回直欲與丘齊才到功名識便迷祇為崔魏大成殿
宰公東坐冉公西

其十九

六朝諸帝摠沈淪古壠寒蕪社鬼隣何事彼都諸士女
刲羊爭賽蔣侯神

其二十

雞鳴山頭祀功臣
蟬冕雖薦天澤新
穎公舌枯宋公餒
縱有微勞何處論

嘲周公瑕館鈔庫街

秦淮南岸小行窩
八十微慳七十多
與說周郎寬誤曲
任他商女亂嘲歌

游莫愁湖徐氏莊

青山如黛水如油
垂柳千條拂地柔
不須真見盧家婦

才聽湖名解莫愁

其二

坐中吳語覺清便三白新筍縮項鰻把向石湖相較看
祇應輸却木蘭船

其三

斷橋頽壁隱蒼烟僵石枯藤夕照邊將比莫愁應不似
徐娘雖老尚堪憐

其四

一葫蘆酒一沙鷗喚作盧姬與勸酬
陌上少年知自悔
青樓拋盡錦纏頭

哭敬美弟二十四首

一口空齟兩鬢星可能知己不凋零
那堪此夜山陽笛
吹到原頭病鵲鴿

其二

偷得餘生能幾時不須腸斷為分離
唯愁業識難憑據
枉向泉臺無會期

其三

一訃驚傳漸已真但來相慰各沾巾誰能洗却關情話
祇道乾坤無此人

其四

當時奉諱十年強何夕何曾不對牀但落人間成聚散
更堪天地兩茫茫

其五

久將情字付莊周有淚何曾汗漫流今日淚來禁不得

始知真痛在心頭

其六

端坐能拋火宅身
共言前路不迷津
惟憐忍位無無著
那可脩然送世親

其七

澹園烟波似輞川
蒼園花木小平泉
而今總是銷魂地
斷送餘生蠟屐緣

其八

新詩十卷寫初成
滴淚和丹字字評
喚作家雞應不分
風神多自濟南生

其九

初從六季倣先秦
晚節成風妙斲輪
若使餘年天假後
老夫甘作衛夫人

其十

容易金門四挂冠
不言田里起家難
前頭正是雲霄路
收拾雄心付蓋棺

其十一

尚憶當年廢蓼莪，悽然弔影兩湘纍。
那知白日迴光處，已傍崦嵫奈爾何。

其十二

子猷當日痛人琴，剛是乾坤死別心。
若使彈成山水調，更應腸斷為知音。

其十三

尚書阡陌紫雲屯，新奉君王表墓門。
莫較生前供養日，

九泉先得侍晨昏

其十四

談玄未竟又談禪似淨身心未了緣何事又添名理障
病中猶著望崖編

其十五

晨朝煮粥啖饑貧夕向寒林施鬼神豈是好生非帝意
不教留却善緣人

其十六

支分身後析秋毫爾自從容見似勞慚愧老夫臨去日
一抔黃土聽兒曹

其十七

晨晡一哭淚全枯淚到枯時氣稍蘇無奈陡然衝念發
數聲天際鴈行孤

其十八

一病經年百感侵到頭方驗道根深銀臺化佛空勞至
不解無生忍處尋

其十九

長將勇退抑飛騰
火色鳶肩未可憑
別有數行家國淚
宋文皇帝語王弘

其二十

欲將何物擬傳真
遺墨縱橫妙絕倫
不展如何便忘却
展來一字一傷神

其二十一

當時得御李龍門
愛爾長呼小陸雲
今日人間留不得

可應相替一修文

其二十二

閩海諸生雅並奇
山摧斗折為君悲
那知匹練吳門馬
髮白顏公在此時

其二十三

遺書一字不闕情
相度須宏士氣平
縱美茲言誰為達
阿兄無意問燕京

其二十四

四十金緋已歎遲腰章一紀未全移莫言卿少年仍老
得老于今也不悲

上人將謁補陀過金陵謁詩為別

百日都無一日閒暫閒如在補陀山難將面目從師勘
且向潮音洞裏還

其二

寶地蓮花不動尊如何移足向紅塵請公但問金陵客
若個能拋火宅身

贈閩人姚應誥林諧林故司寇汝雨公子也

姚生擁鼻無閩語林子裁篇有父風
恠得延津饒紫氣贈余雙劍有雌雄

李宗伯以四絕句慰余請告賦此奉酬且伸後約
清狂賀監雪盈顱再乞君王舊鏡湖最愛青蓮李供奉
掌中投贈四驪珠

其二

一書馳奏請林臯旅病經時骨自高十月霜濃流潦降

憐君空賦廣陵濤

其三

肯向朝賢歎積薪從他籍底日沈淪若教容易居薪上
已作君廚爨下塵

其四

金陵市酒黑於油公肯來尋從事不莫道老夫歸思惡
比他陶令尚風流

公有玄亭還擬載
郢筒語故及之

贈詹常卿與其弟仲發兩茂才

詹家玉樹兩分行
文酒丹青事事強
却有一言應莫笑
不知誰得使君狂

其二

水到休陽分外清
喬髦二子早知名
爭先出匣龍淵色
容易交他樂令評

送潘溧陽徵復應朝便道省覲御史大夫公

尚書尺一問潘郎
可是河陽讓溧陽
河陽種花千萬樹
溧陽祇曉課農桑

其二

河隄使者酒如泉
仙令娑娑舞膝前
但使雙鳬似雙鳥
不愁元日誤朝天

其三

殷勤致問張京兆
親引郎星上帝都
懷縣潘郎應更好
不知明主賜金無

少宗伯李公引疾請告援前例訊之得四絕句

朝霞片片錦官城
負弩諸侯待長卿
見說君王愛詞賦

不教消渴怨金莖

其二

恒時杯底黑頭公
擬探梅花未許同
可是長干春酒薄
教人無賴憶郢筒

其三

空遡長江望故山
知君終自不成還
金陵正好文星爛
玉壘那無紫氣殷

其四

青春容物冠留都難向明時乞鑑湖白髮江東醉司馬
可能無念到蓴鱸

辱宗伯李公賜和六章詞麗意深不揣續貂四絕

仰塵清覽

天祿高從漢省開著書誰似子雲才自言清淨元無染
第少陶家歸去來

其二

六朝風調本無倫結綺臨春俗殺人帶得烟霞兩三字

看君新句已如神

其三

衫紫圍金髮正玄如何稱病倦朝天君家玉局翁應笑
藏史埋名二百年

其四

漏洩春風六和章白門花柳盡施粧王弘自有江州榼
莫向陽家典鷓鴣

永嘉方子謙能詩奕品在第二過武昌吳明御特

作長歌贈之既而薄游金陵無所遇將謁東諸
侯於其行也得四絕句續明卿後

可為金陵住少時綠楊搖曳蔭銅池城南別墅家家有
祇是無人會賭碁

其二

武昌元自長騷壇那有楸枰似建安未作圍碁大中正
已容高品過方干

其三

一枰碁了一篇詩謁徧諸侯橐尚垂宣城若遇羊玄保
為乞當年賭郡資

其四

顏鮑墓荒程李死人間祇合剩方郎

謂揚州方也

君行乞得

孤山譜來向交游詫二方

西宮御溝

清泚彎環白玉溝叢叢綠草襯澄流自從天北金輪遠
不染深宮粉黛愁

璋上人自新都還驚峯汪司馬伯玉尊之為大摠
持而以文及詩侑之余亦得四絕句

新都司馬病維摩說法雖多法不多若使見時無一字
曼殊何處起風波

其二

師子林中大摠持何人不伏四威儀爭如軟草鋪裯卧
過盡諸天兩不知

其三

說法歸來卧鷺峰鉢中收得一盲龍似聞魔事吳門盛
休遣波旬定裏逢

其四

綺語場中誤立身一生塗抹費精神于今較得些兒子
便覺無名可借人

戲贈高坐寺僧

高坐道人談十地醉鄉司馬聽三車但教胡餅傳生菜

何必諸天晝雨花

僧作餅為
諸寺甲

送樂天和尚叅五臺和尚謂我忘言久矣茲欲叅
五臺而路警嚴甚借子一詩以禦關吏呼可乎
笑而許之

五臺拔地五千丈猶起浮屠插漢孤我有一尊無縫塔
煩師將寄老文殊

其二

弇山居士詩名久一字堪師作傳繻其奈西方渺然路
自家猶少護身符

談思重寫梅花贈李茂承為題一絕句

談郎寫梅今絕倫
貌得羅浮月下神
玉笛江城吹不落
一枝留伴謫仙人

沈孺休乞送曹生詩得之即別索一絕句為贈

沈瘦能強它客肥
風流三絕見應稀
雙珠博得酬知己
了却塵緣無是非

黃白仲以二十絕句見投答之得六首

憐君藻思若懸河
何自清時挂網羅
西去汀洲鸚鵡綠

古來名士患才多

其二

明海稽山兩道民轉從詞筆弄精神老夫自是前車轍
不二門中好立身

其三

共愛通侯下士名沈深甲館隱傾城冰心自是俱無染
偶為相如字長卿

其四

如聞抖擻學無生日飽僧厨不糝羹
習氣恐然消未得夢中猶記五侯鯖

其五

鏡湖如黛染山螺莫似黃庭換白鵝
三疊琴心留自賞從他門外有風波

其六

博得才名恨尚遲名高他日自應知
五更家寶拋人去揩眼倉皇向墨池

周山人稚尊游豫章時已十餘年矣今日忽訪我
金陵容鬢非昔而風範不衰復出吳興徐生一
札徐別亦十年屢有言其無常者似一日得兩
故人喜成二絕以贈稚尊時己丑之夏四月也
憐君雙鬢已蒼浪意氣能如客豫章惟是長干顧新曲
有人知是舊周郎

其二

十載南州徐孺子幾回梁月夢魂新因君忽得雙魚信

一日真逢兩故人

汪山人沂者故伯玉司馬宗人也年七十九矣而
詩不衰貌又不衰其游又不衰將之趙魏間依
穆考功而老焉乞余詩為贈得二絕句

三輔游成鬢已銀蹇驢猶自踏紅塵明年試斬淇園竹
西入咸關把釣綸

其二

司馬盟壇衆所宗為愁年少不相容穆生學得王家醞

三尺糟丘擬葬儂

題畫梅寄吳江趙令君季兆君廣平人也宋廣平
嘗賦之故云

空庭一樹影橫斜玉瘦香寒領歲華解道廣平心似鐵
古來先已賦梅花

自瓜洲追大司馬吳丈不及有懷

風流華省接鸛班一作冥鴻不易攀前路數峰青似染
分明秀出是箕山

其二

依稀紅旆影前途欲近仍遙問却無一片交情與鄉思
先隨明月到姑蘇

追大司馬吳丈及之俄而告別有感

喜及前茅笑語新終成離別轉傷神莫疑肝膽非男子
祇為人間少此人

其二

亦知相別在相逢無那殷勤意萬重若過延津曉離合

古來雙劍是雙龍

贈僧叅方一絕

落迦南浸勝蓬萊西有峨眉北五臺寄語圓通三大士
可能端為一僧來

大宗伯徐公攜阿倩見餞婁江命賦之得二絕

紅綃中單白玉膚問著恐是徐卿雛不須劉尹評身價
但道方回勝也無

其二

窄衫微捲按歌頻
人道春卿桃李春
若使青蓮聽一曲
悔將潭水比汪倫

其三

飛白傳紉坐不空
乍迴秋水剪雙瞳
若教攜得金陵去
樂府應添明下童

吳江趙令君特訪我
吳閶走筆得二絕句贈之

閶門祖道如干舫
誰似君侯一片情
此去吳江楓落候
好題紅葉到留京

其二

姑蘇七邑摠騷然
唯有吳江耐熟眠
不向西疇較收穫
神明茂宰是豐年

送張先輩公覲四絕句

少年文價重公車
大貝南金總不如
見說安昌後堂坐

可曾傳得戴崇書

君為張大司成所賞
識時與談經術故云

其二

武昌前度別吳郎
又見張郎出武昌
談笑才情宛相似

不煩抵掌悟莊王

君姿調絕
似明卿

其三

風調吳儂敵楚狂
嶺南詩酒更披猖
未論今夕烏衣巷

天上三星并姓張

姑蘇張子獻翼嶺
東張子萱俱在席

其四

臨歧握手莫欷歔
白酒黃雞樂有餘
若使徒斟建業水
可能贏得武昌魚

送鄭茂才梁辭梅錦衣賓館還閩

貴主妝臺半薜紋金吾新第謁如雲幕中名士從他數
誰似青氈鄭廣文

其二

楓亭驛前荔子丹萬安橋下蠓房寬從教山水金陵好
揔是難禁苜蓿盤

題趙幹烟靄秋涉圖

澹靄徐分遠近山一溪新漲碧灣環行人不道褰裳苦
却似清沂出浴還

贈陳簿

楚臣銜憤出昭關五嶽猶然方寸間
說與傍人誰解惜不如歌枕看鍾山

其二

由來避世有牆東祇合丹陽作寓公
新社摠知無約束酒鑪詩卷任春風

余以秋月履任有閩人孫司獄者廉慈著狴犴間
不久遷廣東幕僚憔悴不自得瀕行搏頷乞言

憫之為賦二絕句

微官遠道不須論
過里先高駟馬門
非關獄吏生來貴
為是于家有子孫

其二

青衫羸馬帝城西
祖道無人落日低
猶有若盧方畝地
賴衣能作數行啼

送吳翁晉游永嘉

三春看盡秣陵花
乘興扁舟下永嘉
製得錦囊塵不染

滿中都貯赤城霞

謝宜興令惠新茶

宜興紫笋

陽羨茶名

未成搶團作冰芽一寸方白絹斜封親

揀送可知猶帶令君香

其二

中泠新水潑冰絲

宋第一茶名

瀉向宣州雪白甕念爾欲澆

詩思苦千山綠竹曉衙時

送王季中北上謁選

莫言相識冶城遲才到胸中便吐奇却語父時東海客
只今王掾不為癡

其二

仍攜何遜上皇州處處江山有倡酬自是官成詩亦就
永嘉今代出風流

其三

當君白下趨朝日是我青山獨往時若向尊庭問猿鶴
已應慚較十年遲

昔年歸臥江左新安汪惟一惠我五湖長印不出
者再稔歲矣庚寅春永嘉林逸民仍刻以惠我
不五日許放歸一絕志喜即題扇贈之

一竿當日釣菰蘆
蓑底名銜長五湖
却被鷗夷生奪去
勞君仍與舊魚符

又答竺西子

春風病眼日摩娑
衣底牟尼在濁波
自是老夫明不得
君今明得待如何



弇州續稿卷二十五

欽定四庫全書

弇州續稿卷二十六

明 王世貞 撰

文部

序

送郡太守廣平吳公入覲序

往吳公入覲時天子方坐明堂大計羣吏而公首以賢能應格為賜宴賜褱蹄織文之絲中外聳動以吳公當

驟遷而公還治郡自若蓋天子方采宰臣言守令用久
任法毋得輒議改於是吳公之還治吾吳復三年矣比
復當入覲而中外之積薦公至三十餘疏計以為天子
所以宴享賢能吏者不問當知為公其所優進九卿方
岳之官以震動海內者不問亦當知為公即宰臣欲久
任公亦不能舍公而他擢吾民欲久有公亦不能奪公
於國門之內而固留之也其士大夫之賢公者則謂吾
識不及古以所睹記二司隸十三行省之郡長吏有能

差肩吳公者乎父老之賢公者則謂吾識不及旁郡以
所睹記二百年之吾郡長吏有能差肩吳公者乎天子
非用三公九卿之位不足以酬公公不去為三公九卿
不足以塞吾吳人之願而吳公固逡巡不居間一過不
佞則自摧謝以無德於吳人而苟免簡書是幸不佞嘗
讀漢史知其時號稱治平而收二千石之效莫過於文
宣而文帝時獨河南守吳公治平稱天下第一入拜廷
尉為漢循吏首吾不知今吳公之視昔吳公何若然屈

指而計今之難於昔固不啻倍蓰也夫漢之所為守者一而已今復置二監司三四撫臺六七御史以据其上瓜分守之精神以應之而日不足以寧無難也漢法三章耳即鄴侯之所增者十餘條而已今走一州七邑之訟而受成諸三四督撫六七御史二監司之所委讞窮甲乙之令而不能徧以此寧無難也漢田歲賦三十而一又時時賜蠲諸關梁山澤之禁多推以予民而今歲賦吳至十之五矣少府之金帛羽毛齒革日夜取足

於吳若寄以此寧無難也漢守得便宜行事今治吏罪
自鬼薪以上即取監司裁而吏之為奸私者百倍於昔
以此寧無難也然為公上者倚公以自安而不復問為
公吏者戴三尺而立顧能人保其業而不中法為公之
民者以得及公治賦樂輸而恐後盈庭之讞得公片言
搏顙懽服解去以故跡公之門而不覩有貴踊入公之
庭而不覩有勁胥登公之堂而不覩有舒吏叩公之案
而不覩有遺牘以此又胡言難也廷尉於漢為九卿去

丞君之鼎一階耳其所以待前吳公亦良至而未聞有所稱塞天子即以是官待今吳公亦能遂志志若黃丞相之功名而已耶余竊徵今吳公寬厚博大若喬嶽之重河海之宏而不振不洩毋論於難易遠隲前吳公即異日之聲施於朝宁者當不淺淺也於是郡司理赫君念無以解公裝徵余之言以為贈

贈中丞永豐宋公遷南大廷尉序

當宋公之來撫吾南畿也其所治江防則西南千里而

遙海防則東千里而近海警以不時至而江寇狎發天子之督責相望大司馬厲色而待赤囊之至宋公之所部郡十母論其它而吾郡賦獨當天下半有所請蠲則為大司徒大司空所持十上而五報罷天下之吏治獨南畿重而又最繁太宰用考功法計吏惟兩臺使之是憑而所任耳目最不易宋公坐堂皇按九郡圖一覽而悉得其凡於是下諸道條上利便備兵觀察王君副帥都督黃君以籌海報備兵觀察馮君以籌江報公度其

重者為條上而其它一切用便宜從事蓋未幾而江之大盜得悉覆傾其窟巢天子既已嘉重公而又逾歲倭來犯公發兵逆擊破之斬首馘生殆盡於是乎有副臺之擢襄蹄文繡之賜而是時歲屢告歉徵求蝟下於是督儲大叅楊君至而與王君合以國計民瘼報公大則為上疏請命次則移書政府顓求寬恤細則亦以便宜調劑之百姓蓋歲受公之貺而歲不知者公既負神明聲諸吏自黃綬而下咸惴惴重足立廼務以含弘掩覆

其短而露其長於是人人知自奮其文吏以不貪為寶
為縣官愛養小民而武吏以不惜死為寶以身任折衝
禦侮之寄江以南庶幾就理而會世貞以不任南京大
理卿議所以代者乃亟用公世貞方里居而王君偕諸
君謂世貞之習公也過而曰吾輩能一日而舍公公有
德於邦人甚大其可無一言之贈世貞既已謝不敏則
相與歎公之習吳也公蓋嘗為吳賢令云其覲閣閑便
苦真若燭照而數計其講說國家大算建瓴而下注之

所措置理解節軼以此為所繇習者不佞蓋始然之既而曰否否以公賢令者知公者也以公繇令習者非知公者也夫公道出王丈成而才近之在易乾元用九乃見天則又曰不習无不利地道光也良知瑩然天則自見夫何假於習也夫藩籬剖則無我無我則物不隔物不隔而吾民不與公一體哉其精爽血脉有不相通者哉即舉而措之天下奚難也大理式敬由獄六官之一職也公故丞饒之何所藉余言即余有言余且以不

能受代矣焉能為公重矣

又

往時中丞開府金陵已遷治吳郡吳郡瀕海其去寧徽太遠江上之警非浹旬不達而又最當孔道以其身受役於南北之貴游即金陵號稱要便然不勝諸達官大人之居間以為苦而華陽公至乃始遷治句容其地於諸屬城無所不近若臂之運指而獨山居非孔道無造請酒食之煩得專其精神於號令聲教公雖不時至吳

郡然以嘗為吳令故於吳之賦訟風俗無所不悉歲一
飭兵待海汎則為駐節太倉久之愛其土風之淳時時
進其士大夫與飲稍談說道理政事士大夫亦欣然相
顧語謂得見幸華陽公而公遷為南京大理卿且受代
諸君以余不佞之素習公也俾致一言之贈余無能為
役獨記舉進士時與公以意氣相豪許抵掌慷慨談說
天下事不倦又時時為詩歌於酒間奏之一夕公攝襟
歛容而誦斗山之末章其節奏指點天真出於醫噓之

際蓋不待亂而汗涔淫浹余臆恍若有觸而醒者自是
公為御史則為名御史出治兵視學於臬則為名臬天
下之賢士大夫日望公之登用而其忌者不勝公之直
以為有妨其骭骹而不欲安公於朝雖數起數屈然竟
不肯小貶其道以求伸而會今天子即大位明哲作輔
乃始寤寐一世之英俊而公屢遷至今官然公於下不
求合其一時之好以干下稱其於上亦不求合其一念
之是以希上許而孜孜焉務求吾之所合於道者行之

以故其所設施始不必盡理衆口而久之翕然若子產之見誦所建白亦不必盡報可而久之則若趙營平之畫策人主與大臣無異色諸君子謂吾吳拜公之賜者三年矣乎不知公之政成而所以賜吾吳者固永永無替也當公慷慨談說時人以為有孟氏之辯其明學術審取予杜絕佞幸人以為有孟氏之氣象而余所信者公之學蓋自一命以至今大位無往而非夜氣之用也余與公偃蹇不甚異後公而撫鄖先公而拜大理之命

鄖簡省易治數倍公而且以不能去矣諸君子即不鄙
余言而再薦之公能不厭之乎公即不見厭而世以余
言為足重公者乎昔人有食澗毛沼沚而美者擬以羞
王公夫余亦猶是矣

送侍御郭公按吳滿代還朝序

今天下名能為國家持綱紀佐人主聰明者宜莫如御
史而御史出行部有視學清戎茶鹽之類以十數其提
衡文武大吏抑兼并鋤梗拂信寃滯護養小民宜莫如

巡按巡按御史所部郡國可二十餘而最繁雄名不易
治者又莫如吾吳中不佞自髫髻至於今垂五十年所
歷事巡按御史可四十餘其寬嚴雖人人殊要亦多奉
公麗情法而其大指麗法勝者不無使人有稱述然往
往遺憾於情其麗情勝者不無使人有去思然往往遺
憾於法情與法不相蔽而寬與嚴之名出今夫展咤而
霆迴矚而電席捲而颶楫擊而霜見以御史為天子張
神氣也煦而和風漸而甘霖乳而保姆溫而挾纊見以

御史為天子滋元氣也不用之則不得言御史偏用而不兩劑之則不得言賢御史名兩劑之而不各當其可亦不得言賢御史蓋自吾髫髻以至于今得御史四十餘能兩劑而又能各當可者則母如兩郭公其前郭公之去吾吳中居官數躋數起凡十餘政以至大司馬而吾吳人之稱郭御史若新最後為今郭公公不輕有所出入其三尺恒凜然而用意必依於忠厚即有所彈治上不欲輕棄人之才而下不欲輕盡人之情蓋四雄郡

一望州十七巖邑之大吏其賢者爭自濯被惟公之是效而不肖者若神明之在上不敢不强就繩墨以祈無汚公筆至公所論建不務責一切目前小辦使便益與國體相為用有味乎言之也談者猶謂前郭公之舉御史職甚易蓋其時民不覩兵燹困徭賦富家子鮮衣怒馬以恣其好而已上不為苛文蝟責尺一不數下聽其自課考功法而已又無所親信耳目以伺撓之較若畫一而已今公所程職十難於前郭公而效倍之公不為

猶賢乎哉公已滿且代而吾州之大夫士無所私德公
然心以公為賢而命不佞紀其說以贈公行矣猶有殿
最之簡書在昔管敬仲之所稱郭公者以其能善善惡
惡然善而不能舉惡而不能用以為惜知公之必無是
也前郭公名宗皋嘉靖之己丑進士萊人公則隆慶戊
辰進士魏人

送大司寇餘姚趙公入賀萬壽兼考績序

先是趙公以少司空正留臺遂為大司寇合兩政者三

載於今矣而會丁丑八月為皇帝萬壽節大宗伯太宰
推公以捧賀行公亦遂得自上三載之績留都之公卿
大夫士中慕愛公而偉羨其事相與為文及歌詩以餞
之而吳人王世貞嘗獲事公燕中其自鄖入備棘寺又
當從公後以言罷歸里弗克與而族人都運汝康者亦
以故二千石受知公又其子太學生仲極從事公於司
寇部乃屬世貞效一言之贈都運之受知公也公蓋用
御史清戎滇棘云是時權相縱其子為孽公不忍宗社

之帖危上書力爭之詔使逮捕萬里而遙而公毅然不
色索霆霓暴震於頃刻而公不色懾風雨收日月吐放
公於大鹵之埜而公不色懾第歛精韜光以俟偶然之
發脩性養氣以貞偶然之遇而已會隆慶初天子收召
直臣公首應命屢進九列厯臺省以至今官諸一時名
為直臣者天下延頸而趣之以為景星祥麇而顧其中
亦不能無沾沾意公故一切忘之毫髮不以滯留即不
僅安直臣名而求太上所謂者其高至於究無始通無

外公一切絀之而約其實於倫物之內是故徇跡者不敢疑公于虛超跡者不敢卑公於實天下蓋兩重公而公兩劑之矣公之領留臺領大司寇務於持大體不責一切苛辦賢者興不賢者格黜者莊之若神明而弱者就之若冬日即天子重體貌大臣不以最問公公又何疑於最也公行矣天子方下有司議大婚禮陰陽訢合蒸為太和而公以六卿之正率先方伯連帥進師保道義身體之訓不賢於金鑑什百哉江漢之詩王命召虎

用錫爾祉釐爾圭瓚鉅鬯一卣告於文人錫山川土田
母亦嘉虎之最足以膺上賞哉而虎拜稽首天子萬年
蓋先拜賜而後稱祝也今公先以萬年之觴進矣天子
為敬舉之而後太宰按故事錫祉於公其視召虎有後
先典則一也天子遂竟留公而公亦遂實為師保其所
究於道義身體之訓者不亦深哉明明天子令聞不已
將于公乎是望矣

送州幕成君遷烏蒙郡幕序

嘉靖中余以比部郎決江北獄識御史海陽成公於淮
陰其人明信廉厚君子也尋余以副臬治青州兵之三
歲而公亦用其官治臨清公至而余報罷久矣旋以家
難道相值握手洑瀾而別凡十年所余再起而公致其
政歸且捐館舍久矣余自再納鄖陽節還里中而識成
公之子某於州幕恠其貌恂恂若不揚然而好動者慙
率矣與之語嘿嘿若不出口然而好詡者慙夸矣卒而
試之寧遲而不失度繁以試之立辦而能自韜意者其

猶有故家宿儒之遺模歟將持循好脩之風有所受而
未竟吐也一日酒間語及家世始知其父為海陽公相
與泣然慰勞良苦而成君之奉職無害吏民信而念之
一旦報有代者蓋銓曹之與考功牾妄傳君有它君方
以入計最聞銓曹意不欲移代者而勢又不能安君乃
稍遷烏蒙郡幕夫烏蒙越在西南萬里外所謂竇旬牂
牁之域其王雖漸夷而守然往往取羈縻奉行文書而
已有一倅兩幕大概不能至其地寄祿於省以希沿牒

攝事之一役藉令銓曹為不知君耶則何以遷業知君耶又何以烏蒙為也君試吏未久所俸入不足以償宿進而大司馬方嚴郵道之禁無咫尺繻以為行資陸則援劍閣凌邛坂猿跂鳥息水則牽百丈穿三峽而上即成君號健幕安能徒且襁負也雖然吾聞之朝歌長虞謂云事不避難臣之職也烏蒙誠險遠成君誠貧不任裝然幸天下一家靡有剽抄蚤暮之警君第達蜀必有所處君者異日稱循吏西南夷中無負名家子吾知其

為成君也耶

送大叅楊公遷廣西觀察使序

萬厯丁丑秋八月尚書吏部言嶺右按察使缺請以吳督儲叅政往詔曰可於是叅政為姚江完愚楊公而郡守李君及其僚念公甚不忍舍而又不能留公乃具書幣而屬余山中以導行之序請即余不文忝從父老後食公之大賜而又嘗與其伯氏偕制科為燕中游不敢辭則謂今天下財賦首吾吳畫江而擅膏腴凡四郡二

十州邑之賦當天下半縣官之所需自六宮以至百執事六軍靡不仰給而以一叅政總之則甚重其賦自大司農常計外少府水衡將作之所筦山衡澤虞關梁鹽筴諸課以巨萬計移牒旁午取給於一叅政而其職又得兼治獄訟綱紀文武大吏羯羴之俗所以理之大氏與賦埒則又甚難然其始未有置置之自嘉靖中大宗伯翁公孺叅始尋報罷久之乃復議置蓋後先不能五人而余所辱與者翁公與今河南按察使舒公汝德併

楊公而三耳其皦然著於人耳目以為良而余所心慕服者亦唯此三公而已翁公精心殫力夙夜自課責以興利剔弊為務舒公體氣高亮風稜肅然吏畏而民自懷之二公之用不同要之皆國器也楊公之繼舒公孰不以為未易見長而公亦雅不欲以長見顧其貞心大度使賢士大夫有所亮以思効而沈密靚慎不肖者茫然而不知所窺時方核名實見當以為驚擊公雖不廢激揚務思所以為長者時方重羸積見當以為蝟取公

雖不廢催科務思所以重國本即部屋莽鄙或不能一
一悉公而君子竊得其調劑之苦心矣吾聞之王使君
陽德言公前守撫治行第一第不肯輒髀事上官以苟
覬顏色前後慰薦莫之及然卒不能勝夫遠邇中外之
望而天子為之特賜褒擢以至今官使貌公而近之固
溫然若可悅而悅之少不以道即拂然不受雖號為至
貴倨若臺使者不能以一語輕加公夫余所得之公以
厚而得之王使君以介若此公所新蒞為按察斤斤持

風紀彈壓百吏而又何疑於往哉且公以天下之所甚重且難若吾吳者而理之若游刃而況一嶺右又其職止按察而已哉往者翁公去吾吳非久天子以吳吏民之習之為建中丞節來開府按察使法不久任而吳吏民之習公無異於翁公詩云是以有衮衣兮毋以我公歸兮以為嶺右人語則可夫吳不能一日忘公公其能遂忘衮衣吾吳哉是故敬從李公輩浮公以大白而祝之曰行矣請得偕諸父老約日而候公於吳江之澣矣

賀坡陀王司訓膺獎序

坡陀先生為諸生不及資以材上春官既廷試而天子
竒之擢為第一先生素好樂律精得夫元聲元氣之本
乃進樂九章演為圖說以上詔報聞蓋燕中士大夫無
不慕說先生者而先生僅得太倉州之訓導先生來為
訓導益讀書砥礪行誼暇則延見諸弟子講說經術善
相長過相規以為恒諸弟子人人悅服也而來為中丞
御史者故嘗於燕中慕說先生又益習聞其教事益大

喜每當代輒下書旌先生蓋三年而五被旌矣其旌語
非一然不曰浙名士則曰吳賢師云所以稱名士者先
生居浙西為諸生考校輒優等然臺使者不以文而以
行旌先生諸生之有旌則自先生始也其稱賢師豈不
以先生能讀書砥礪行誼暇則延見諸弟子講說經術
善相長過相規人人悅服乎哉若不佞則以先生之所
論樂而知之蓋唐虞之際舜以百揆寄禹以羣職分九
官十二牧而教胄子之責所謂直而溫寬而栗剛而無

庀簡而無教獨諄諄焉以命典樂之夔夫子語學而所謂興於詩立於禮者必待樂而後成今國子祭酒太學師也於古為大司成又曰成均夫亦其遺意哉先生之所被旌為賢師者人人能知之先生之所以為賢師者獨不佞以樂窺之人人未必知也先生其識余言異日入而直四門六館與聞國子祭酒之政毋待言矣即屈為縣邑令長記有之聲音之道與政通子之武城聞弦歌而莞爾者固在也先生其不稱賢令長哉於是先生

之門人某某等次不佞言以為賀

贈州牧仰松張公導水平賦序

始公令常熟而治理流聞吾州州父老相率而謂其士大夫曰是安得一借公為吾州守哉其士大夫曰固也公行以高第入瑣闥矣於格不當守守且屈公而亡何公果進比部郎改給事中垂為其長而會以伉直故出佐某邑已復進應山令仍用高第拜吾州守距其為常熟幾十載而父老乃驕其士大夫曰謂張公不當守耶

而吾州何幸以得公然竊意公自遷客濶畧民事而公至所幹理益精於治邑時其大指乃在挫豪右施舞文創諸惡少年然毋使蠹吾治與害吾貧寡頌赤而已度小改則寬之亦不為一切苛索株連以故亡大小强弱畏者不廢愛而愛者不敢忘畏中外數百千萬人之命操縱於公掌握而公之精神心志流通貫徹於部屋荒鄙而亡所閤屬大司農督逋之檄旁午於臺使者下郡邑度以為得罪敲榜囊拳之下中人無完產而下人無

完膚至有瘻於獄雉於家者公故徐徐時虛其贏以寬
上心而於下則示之實限較區肥瘠為次第故謹叟之
聲蜩起傍邑獨吾州晏然而其輸額顧反溢公以間行
城之東門睥睨間而望曰大河湯湯安得不入震方而
故迂之使西而爭金虎道以進又亟退也盍復故水關
使東西交會於學宮以滋吾士氣乎則又曰水環城而
自隍墩若壁也奈何里輒堰之以為諸弁帥橐俾壅而
不宣其氣遂通之公又念向者為民請一日命不憚以

身塞然業苟給目前而已而不為之平其賦若何乃議
簡賦長前守有所行區即其催辦戶以歲長賦見謂其
名美而數畝之家懼不勝筴有棄而逃耳公謂產均以
年年埒以產悉除去其貧窶者不浹日而賦長定懽呼
載道即應長者亦心服且謂何如及我公而役庶幾其
保持我也公之為惠最先於小民而為禮篤於士大夫
以逮博士弟子靡不心慕愛公公受三臺旌則相率而
請慶其懸弧旦則相率而請祝公笑曰不穀豈待旌而

重耶且夫為守相者奈何以一生辰勤民也力謝不可
衆度無以報公則相率詣世貞言公治狀未易更僕數
然其最近而大者曰導水曰平賦大較如前所云意以
世貞最習公而不為調言庶幾其有當乎世貞竊聞公
前為給事而工科則三疏言漕河大計遷戶科則又言
海運及東南根本至忤貴臣而不少挫夫公之所謂導
水平賦者在天下今屈而僅為德一方抑何廣狹不類
也然公嚮者能言之而不必無扞格即無扞格而不必

奉行者之皆若公公雖屈為守其去民近矣為德雖一方其德於人深矣吾聞之汲長孺當守淮陽至泣辭以病力不能任郡事願為中郎出入禁闥補過拾遺而人主不之許以徒得君重卧而治之假令張公若長孺能不薄吾州而拂意於去故所居官耶乃公無薄吾州而精心勤恤之豈不賢於長孺倍屣也雖然長孺後先凡十年以故雖卧而治之而號為政清今公資望崇積甚旦夕遷矣其悉吐其奇以終惠吾父老及士大夫世貞

尚當操觚管而俟

贈魏崑岡先生授官光祿序

吾始讀周禮而竊有疑也以周公之明聖而著為萬世之典六官之所推首而佐王治邦國者其屬士五十有六而膳夫庖人內外饔烹酒正漿人微而至於獸餼醢腊籩醢醢鹽之類合內外男女之職居其十之七八其所謂治者安在而於所謂大冢宰安與也第不啻夫天下之至重而甚要莫過於君之身而其次則王后世子

其粗可以養榮衛而精微之極至於育德而和性俱不能外故麥羊菽雞稷牛麻犬黍彘之異食而疏達高粗圜閤廉深閤闔之異器食羹醬飲之異齊酸苦辛鹹滑甘之異調往往與王氣合而所謂夜鳴而盾之牛冷毛而毳羶之羊赤股而躁臊之犬鰾色而沙鳴之鳥盲眊而交睫腥之豕黑脊而般臂蝼之馬諸有妨於膳饗者精致辨焉蓋至於摯御僕從罔非正人而其重可例推也以故雖晉德衰而平公不徹樂於大臣之計而一宰

夫得以大白而浮之庖丁之所辨於理解斤斧者其治
理何替也國家於大官尚食之令進其階三品列於九
卿而美其名為光祿又四分其署之屬而以士人領之
此其重寧下於成周比年命大冢宰遴諸上舍之升秀
次第授官而吾崑山之預者十有三人然其十二皆外
僚而獨吾叔丈崑岡先生得為光祿四署之佐蓋吾少
則侍故光祿典簿東溪翁游先生為翁最小子讀書明
道理恂恂退讓長者崑之人方以父子列近侍奉人主

御食為一時榮而不知其所係至重而甚要也先生之伯父故恭簡公講業東南為世師表嘗授先生經於童子時聞所著有周禮沿革者雖未全而天官一書固鐵槌三折矣吾雖未獲盡見之竊意其於宰夫之職重且要當亦無以大異先生幸以需次未即受當益精其說而俟之異日天子坐明堂大亨以養聖賢先生抱遺書而進必有合也故因其從子大恪請而授簡以序

弇州續稿卷二十六

欽定四庫全書

弇州續稿卷二十七

明 王世貞 撰

文部

序

送大中丞荊門王公入內臺序

今國家所賴以綱紀縉紳統均中外者其重則無如尚書吏部而御史臺實與之頡頏而相表裏其最重而號

令宇內則無如京師而留京為之陪佐大江又為之襟帶之以故督江防者次重凡中外之所重而後先屬之一人者於治世其人則必賢其人賢則於官於地無所不益重僕不佞求之於一時之賢者而未有合也近獨見吾荆門公公始以邑令高第入吏部於諸曹靡所不歷踐而其最後長文選考功公之為曹長屬時事有所鼎革而公獨精心於賢不肖或直而遂或婉而劑務達其志而後已當是時翕然以公一曹長能使其部重而

其遷為容臺尋以銀臺理兵部黃頤號為閒局而公所
持論鑿鑿破世窾中間嘗一使雲中上谷與其大帥摹
畫邊備雖老將為之頻首而公自是受知人主簡佐留
臺督江防事江上下數千里其西藪鄱陽而東藪大海
盜發以不時而臺所蒞遠又時時與撫臣按臣錯即一
令下而莫知所適從公至則首覈文武吏之恬嬉者其
它一切用柱後法治之吏士捧尺檄而嚴霜凜然若在
背所謂數千里之遠臂運指應而不敢頃刻違盜遂鮮

起稍起亦隨就捕而公又開朗坦洞不設城府獎進賢
豪士與之均肺腑以故其畏之者雖盛夏之霜而親附
之者則沍冬之日蓋公至而江防遂大重於它臺矣公
今所佐御史臺其重與尚書吏部顏顏者也即拜日而
汾陽之聲伎京兆之騶從能不有所裁損哉第說者謂
天子冲聖茂學問三公精白寅亮以師百僚官府一體
遠邇率職即臺亦不過按故事奉行文書而已何所用
風采為是不然凡使臺不見風采者最治世也使臺不

得見風采者末世也使臺得時見風采者中世也以堯
舜之際四凶既以除比屋可封而咎繇尚不廢為士然
不聞其所舉按何條而其可見者與禹稷諸大臣都俞
吁咈於一堂之上而已末世固亡論至中世而馬威卿
薛贛君宋廣平李易之之徒始以剛稜伉爽名嗚呼亦
豈得已哉公行矣自今而後願公為咎繇願公以九德
之昌言進而共化理天下俾神氣融而為元氣不亦偉
歟藉令公重臺於公常事耳無所庸贅矣於是公之屬

大叅王君憲副馮君善之而請為公贈

送大郡伯雲溪劉君署崑山得代序

當唐宋之季中外縉紳大夫或坐公私譴而有所左降
為州郡之倖若長史司馬者往往以遷客視之而其人
亦往往自廢放毋問其職業而托適於游覽觴詠之間
高者虛無其官以為毋足溷我卑者厭薄其官而不勝
其懣悽牢騷之念以庶幾一日之量移即才如元白而
皆有所不免觀其倡和諸篇什來往尺牘與廳壁一記

大要得之矣至我明而始不然然即其名能不虛無厭
薄其官而為大臣器者亦不過喜吏事強力程課亡害
而已疇有能以身抗上官為民請一旦之命如陽道州
者耶用經術率先諸生彬彬嚮教化如文蜀郡者耶乃
至我雲溪劉君而又不然君之為諸生試於鄉及上公
車所肄程式文重天下然僅於取一第其成進士拜大
行奉使不辱命隱然當臺閣選然僅遷一比部郎郎而
讞決江南以明慎稱其報命不愆期誤以為愆期而擿

之君又不自明其寃得判吾郡判吾郡而垂三載不遷
君又不自明其淹凡連署大邑若無錫若常熟者再而
所至一切就理最後署吾崑山未幾而臺有長賦吏胥
逮君力爭之臺曰夫較吏胥之賦殿而加笞責者有司
職也不足以辱臺即吏就係誰為督胥賦胥就係誰為
督小屋賦者請一切小寬之而不肖倖請身任責臺雖
意不憚有所誚戒然自是竟寬逮矣而君於平賦訟之
間則進諸博士弟子而課試之以至里社小學之秀亦

附試焉所褒予次第必當時時談說經術與制科之業不倦也會有新令至君且得代還佐郡事而諸博士弟子感恩德而願受經者若而人而不佞從孫志伊亦以里社小學與焉謂不佞竊效一言之頌不佞不足以知君庶幾文蜀郡陽道州之風哉天子方用考功法第諸道督學之臣且以吏治責二千石公異時皆其選也所謂大臣器固饒為之矣彼以游覽觴咏稱遷客若元白者雖不旋踵而顯榮操內外制烏足擬君哉烏足擬君

哉

送大叅永嘉陽谷王公改任叙

始永嘉公之為吾吳兵備使者也其御將則毋抑其體
以冀伸其才其御察盜卒則務精其選而厚募格以冀
得其死力其治吏則能鉤鉅參伍以見弊而時有所縱
舍以冀其改其待單赤則無所不勤卹公在事二歲餘
而島寇入犯公勒餘皇載組練蹙之沙而大破之天子
進公為叅政仍故職於是以叅政才可寄劇諸非使者

任而為漕政為水利悉以畀之自公以功名起則不能
無忌人因緣欲困公以事而公所治理益精然公於職
益舉則益不勝忌而會歲行盡漕舟數百千艘悉涸於
潤州道中諸當事者目相睨策之母所出公第令堰舟
前後諸支河口悉堰而分部吏人晝夜剡河水以益之
不一月舟悉出京口無留者一時鼓舞稱頌謂為神而
言路以稽故法論坐鑄秩臺謂公實不稽故復所鑄公
又策漕計幸悉達且將有河患而太倉儲粟可支數歲

陳粟皆紅腐衛士不欲得粟價驟減從容為撫臣計以
歲半收直而小寬之於兵民俱便撫臣計雅已定得公
言矍然具以請言路復謂收直易轉餉難坐公避難論
撫臣復上言公實不畏難俱報聞而是時盜賊沈命法
益嚴前有刼者獲其人而非已報上矣當死而真刼出
公為具實前撫臣以聞而臺不之察論前刼死言路復
謂公初誤入之復坐鑄秩前撫臣白公誣甚峻不報國
家雖用沈命法治盜而其格凡監司坐刼起部中以輕

重論即刼起而如期獲者勿論且附功狀始海寇數人要殺鹽場官公移所司嚴緝不踰旬得寇而吳閭道中刼傷一郎次日即盡獲之於格當附功而言路前後皆抑絀弗論而止論罪其前疏報仍鑄秩而後疏則調簡之命下矣公方謝一切事杜門取進止而余唁之且笑謂公使者所轄四郡一州十七邑之地皆負江海以與島沙隣而中為南北孔道五民之猾數之而又日示以可欲即使百使者堦而率熊羆之士蚤夜而寄干陬亦不

能保不盜也公笑曰吾不能保不盜能保盜敗且夫不必百使者即一使者而居要害之地專精其職而不掣其肘何盜之足憂夫以一使者而綰十臺四郡一州十七邑之職於其間上責授事而下責受事分歲力而道途者九之其謁叅七之拊循二之而已分日力而案牘者九之其上臺六之下郡邑三之而已即竭吾足而不能無責於道途也竭吾目而不能無責於案牘也吾憊矣且歸卧暘輿矣蓋命夕下而公朝出舍於舟其喜色

溢大宅也而吾州衿紳之大夫有觴而泣於澣者鄉之
父老不及衣履而慟於郊者介冑之士慟於百里之外
者而其穎若觀察使李君行太僕卿徐君右諭德王君
輩則謂不佞有以叙之不佞所見者跡耳夫惡能悉公
第竊謂天子與公卿輔弼之臣非不悉公功狀也又非
不悉公竭力而國計民瘼之是厯然不能屈二三言者
之論而竟至移公者其意緩以收公之用而百欲全之
也諸臺使之悉公也甚於內然而不能犯一二言者之

論而留公者亦此意也諸襟紳介胄吏士父老之悉公也甚於諸臺使然而不能以死請者亦欲善公之去而冀公之來也公具專精神輔飲食毋遽忘我吏民天子一日思公治效與公卿大夫熟計而俾公開府吳即二三言者且幡然而謂吳非王公不可何況其它哉公它善政多至不可指數有祠而記之者茲不叙

掌教金華胡君膺獎序

胡君故以文學應歲辟然其為吏部選人輒高等兩補

大郡倅而偶用干陬之警當調吏部惜之得掌吾太倉
教事太倉既天下雄州其諸弟子彬彬藝文又為東南
冠胡君之始至也溫色而進之母問東脩贄為開習禮
容考校經義文成則又使之言志以觀其低昂之嚮而
財成之諸生蓋翕然稱服矣而胡君顧以倦游奏紀諸
臺使乞歸諸臺使咸慰留之而最後饒御史滿則下書
亟稱胡君學行規條種種可嘉其令有司以禮幣示褒
於是州大夫會稽張君始新吾州之學舍顏其後堂之

楣曰振德而它博士從諸弟子束帶褒衣來詣余謂振德之楣甫揭而胡君之獎適至故君道尊而業明凡鼓舞勞來所以振德者非欲施之胡君欲胡君體而施之諸弟子也吾聞宋之初始設郡學宮以肄博士弟子而安定先生瑗自吳興移授吾蘇其所行規條為一時式而諸弟子去而為名卿大夫者比比胡君豈其苗裔耶何其教之似安定先生也今天下人才遠隲於慶厯皇佑間而天子數下明詔更新新約束吾州之豪傑又有不

待文王而興者胡君振德之績報即館閣監司且虛席待而奚一臺獎之足賀也博士諸弟子曰固也請以語胡君與君交勉焉

送按察使脩吾馮公之湖廣右轄序

當萬厯之甲戌而盜驟起江上剽蕪湖庫都下為震動一時節鎮監司皆有所徙置而脩吾公自晉臬入賀萬壽執政者才之俾以故秩鎮太平監督五郡公至則設方畧購募盜先後授首所創設軍令旌旗壁壘一新材

官劔客惴惴受約束恐後談者以李臨淮之治朔方兵
不是過也亡何而徽之屬城用爭賦閔公徐出片檄解
之皆懾伏莫敢枝梧事遂定一切治理流傳近遠而吾
郡與比壤綰轂江口其重倍於太平而盜藪則蕞之財
賦訟獄則又蕞之諸議者咸以為必移馮公而後理而
公合前後秩踰七歲乃特超公為提刑按察使俾寄祿
楚而監督吾吳四郡會代公者以守邊堠不至公兼督
故所部自如當是時天下之寄重飭兵者莫吾馮公若

其秩峻而望隆者亦莫吾馮公若吏民拭目滌念以待
公公至之明日悉罷去無名供及一切不急之役爬搔
兵弊殆盡大率將無匿卒卒無匿食至春汎公出一語
而環海數百里翕然而聽命諸胥若增堞而餘皇若增
翼者其文吏廉平無害公則優假之俾各盡其材用屬
歲侵而公所居部為吾太倉尤甚公所以緩頰臺使百
方冀得一請命沾升斗惠雖格不盡行民之愛戴公固
冬日也居無何而公擢右布政使遂真為湖廣縉紳矜

裾之士相率而詣不佞謂馮公之始來也凡再易鎮而猶為治兵使者以重吳也其峻而秩按察使為吳重馮公也重吳則曷不少留馮公以惠吳為吳重馮公則曷不以中丞節畀馮公而使之袞衣南土也且夫楚雖號大藩猶閒地也右使雖稱貴重於它官猶閒秩也似非所以重馮公也不佞謂馮公之來也以望而其遷而去也以資望重則不能無徇望資深則不能無徇資今廟廊之所擬要鎮者若干其當是任者若干而馮公之指

首屈焉子知馮公之以右使去也安知其不遂以中丞
節來乎哉又安知不以中丞節開府楚乎哉於公行第
浮大白而請曰公行矣武昌不佞所舊游地也踞黃鶴
頻鸚鵡而蜀漢之二江合焉汪洋浩瀚浮天無畔則公
之廣心大度與謀也大別之山玉峙凝然欲雲蒸霞則
公之重器宏畧與謀也如公之遂開府楚楚人福也不
然而有意於故吳哉不佞當從諸弟子竹馬江之滸矣

送州牧仰松張公遷淮左史序

張公之守吾州也蓋自諫垣謫而歷丞令以遷云公之遷雖自通山令而其前為令高第則常熟常熟之距吾州不百里以故州之吏民習聞公之風猷約束爭以其誠輸公公甫下車而於閭左土田之腴瘠燥濕若其風所踐歷者也賈人子之乾沒與吏端之首鼠曙之乎若皎鏡也吾吳賦最重故事守坐堂皇敲榜竟日夕至有斃杖下者而公第取一二大豪警之曰與而約以某期完不者吾立籍汝其大豪惴恐如約以次第及中小豪

而姑緩單民之以畝訓計者故公之扶不過十而賦額
登踰於舊諸訟人至庭中不數語立剖人人自謂若神
明其衷者第略施之夏楚或付三老持去不責贖而至
中豪以上重足庭下背若負霜雪矣即公有它出或謝
病計所積案當日而以一日決之不爽其治理一切
流傳它州邑往往藉公為重而公以間召故所知或輕
輦過之輒命酒曰可以大斗勞我矣酒酣耳熱談說天
下事若指掌雖不佞亦謂公一旦握諸邊虎符可以飛

尺一而釐定疆圉之地而乃傳有遷公為淮左相者國
相雖秩高於守而事寄則稍輕聞者咸怪之意公在諫
垣扼腕而論朝事若不能無牴牾哉夫賈生之傳長沙
則絳灌為之然漢法諸侯王相秩中二千石傳亦二千
石重於守而賈生獨以一卑濕遠外故侘傺無聊至於
弔屈賦鵬瀕死而後已何其狹也乃張公殊不自恨曰
吾得長有王門幸甚即絳灌誠難我我奈何重自侘傺
以供彼之快夫以吾家子高之賞罰分明見惡輒取與

夫越法縱舍有足大者賴諸公之力時時有之然子高用高第守山陽人主使之陰伺昌邑狀其所報陳不免有訐察語而不佞當顯信親睦之朝擁銅墨曳長裾而為賢王輔我不能若子高袴褶從吏車數百兩而守王宮窮窘蹤跡然至飽飯眠鼾有不須吏適哉不佞乃前浮白公曰吾始而得公材今乃得公器也夫太阿之劍出匣而風霜距發剗蛟龍剗犀象及其入而佩君子之躬折旋周旋雍容如也吾故知公之為器大也淮之初

封有王榮者為右相仁廟召而為左給事公今以左給事往為左相夫世事若循環然遠不見子高近不見周恂如哉諸大夫曰善其叙以為公別

贈別汪惟一序

新安汪惟一生毀家而業古文辭嘗以師禮禮故人徐左使子與已北走濟上禮李觀察于鱗如子與已又東走吳禮余如于鱗余固謝不敢當而是時惟一所推賢者汪司馬伯玉所慕說者余弟臬副敬美及吳大叅國

倫已又久之而子與卒官江西惟一自家奔哭于江西
弗及則又奔哭長興之廬歎曰何以報夫子地下走謁
余叩頭以子與婦之命請曰願得子一言以文麗牲之
石余謝不敏謂惟一嚮者吾入雲哭子與業許之矣待
其家以狀來夫豈唯余言將七尺之顛屨與書力任之
則又謂惟一如斯而已乎曰不佞歸而以墓中之石請
吾司馬如斯而已乎曰不佞之俟司馬有成諾也治舟
而之江右謁臬副以傳請溯江而上至楚謁大叅以誄

請及不佞之未辱螻螳而有以復夫子也蓋惟一之留
余里者且兩月而子與之初稱子者自以子去而其子
來稱嗣孫者少孱畏其大母妬又無所謀狀久不繼問
惟一內煎迫舌為焦卷謀復走長興趣其家狀且行矣
一時諸友生義其為賦詩以贈余聞夫楊子雲卒而葬
安陵坂上所厚善獨沛郡桓君山弟子獨鉅鹿侯芭君
山為歛諸公賻起祠塋芭負土作墳而已亦未有以文
之自揚太尉景謁者袁三老王封丘輩之歿諸門生故

吏乃稍能於所謂麗牲之石為辭以紀而碑陰則皆識其門故名氏以昭示永永且以愧夫翟公之所謂交情者至崔子玉之傳張河間蔡伯喈之傳橋太尉陳文範郭有道則為之後者或其徒又能以天下之文文天下士其文與其人兩相待而成不朽亦難矣哉千餘年而得惟一也然子雲之厚善獨桓君山其門弟子獨侯芭計其所受益於子雲者不啻深而所報僅若此子與厚善滿天下其束贄而稱門弟子當亦不下數十百人而

今乃僅一惟一何也顧其所受益不過詩酒談笑之緒
非有太玄法言之受而惟一者得墓碑不已而又欲并
得夫志銘傳誄以慰其師地下所稱報又何如也王封
丘之門人有杖而斬三年者其徒或以為過惟一寧為
三年跡而已乎惟一行矣諸友生業賦詩以義之故母
乃曰市義哉則非余所望也

賀大宮保大司空印川公治河功成序

潘公之卧吳興三載所而天子思公治河功俾以故節

撫江右久之入為少司寇未上河復奏決詔超公為御史大夫領左司空以軍興法治河得便宜從事諸河隄使者自青墨而下至黃綬皆聽約束公乃大集羣吏而詢之曰今者與若治疇亟也夫漕河之有南北也淮實鬲之其北自徐而南抵淮則皆受黃河之水黃河溢而旁決則淮以北皆魚而河之故道細而不能漕淮河得黃河而浸益巨其尾閭洩於海而旁入維揚之漕河其半受淮之水尾閭壅而不時洩則旁入者怒而潰淮以

南皆魚而河之故道與決田共而不能漕今者與若治
疇亟也或對曰北河決而河涸不能漕也姑棄之其決
可漕也則加導焉淮挾黃河而下莫捍也將為支河以
殺之乎尾閭壅矣其泥百里誰能耗而畚鍤也將別為
道乎公歎曰不然棄故河一棄不復也因決而漕易淤
也開支河河不兩行也別道海鑿空不易也吾其先疏
尾閭乎則又以耗而畚鍤難之公乃操輕舠循海口周
覽而歎曰吾得之矣夫河多潰而不入海者海以淤相

逆也河性猛而不能決淤而入海者以多潰而力分也
欲疏淤則莫若使河順流而力專欲河力專則莫若高
堅其隄埧欲防河之善潰則莫若於隄埧之外為遙隄
以郭之使潰河有所遏而歸於一議者塞公乃偕督漕
少司徒江公具以其說上請天子覽而是之與今相國
張公謀下其疏大司空大司空熟計利便上報可公繇
是大庀郡國材力盡淮南北而里分之謂郎中余君汝
率若屬維是淮北桃源古城之南隄及遙隄增築之決

口塞之當為壩若閘者治之謂叅政龔君汝率若屬維是徐邳之役視如余謂叅政游君汝率若屬維是靈睢象山徐州之役視如龔謂臬副張君汝率若屬維是桃源之北岸至徐州南岸役視如游謂臬僉朱君汝率若屬維是睢寧之南岸役視如張又謂郎中張君汝率若屬維是淮南高家堰而北出閘沿淮之隄增治之決口塞之當為壩若閘者築之謂主事陳君汝率若屬維是清江浦之役視如張復謂前臬副張君汝率若屬維是

淮安之新城北舊隄柳浦灣高家堰之役視如陳謂臬
僉史君汝率若屬維是寶應之役視如張謂楊守虞君
汝率若屬導高廟至儀真淺謂淮守宋君汝率若屬治
汝郡之閘若壩既僦工公乃偕江公往來拊循之諸君
亦自勉與吏士分功版築間不浹歲而告成事大約省
費計初額減十之五役夫數十萬無饑寒死者河率由
故道迫於隄而不得潰則專力以之海海若埽而闢者
河得海則不移怒淮以南諸州邑之浸盡出而為南畝

天子嘉河之復也與歲漕之登額也特進公大司空加太子少保予一子官賜白金二鎰而殺文幣四各有副江公遷如公故官而余君游君輩亦以序受顯擢諸吏卒褒賞過望於是二三君子相與稱公之碩畫而荷公休以不佞素習公走幣數千里徵言以為賀公後先凡三治河河功輒就而其再治而再報罷也不佞寔以前叅政馮君輩請而贈之言今者何能辭不佞蓋三復公疏而歎曰純臣哉潘公也公之最後命加重矣天子委

河政公舉大司農水衡賦而聽之即公胡不捐數百萬
金錢以因決而為新河張大其功伐樹八尺碑而命之
曰此潘公河也即又胡不捐數百萬金錢以別鑿尾閼
之口而張大其功伐樹八尺碑而命之曰此潘公通海
道也顧厖厖焉即故河而惟左右隄之是飭卒之河海
之壅闢而漕不病乃其告成事不過曰借水攻沙以水
治水而已推公意寧不獲以其身當上賞不欲使國被
實費而河卻實利於戲豈不亦皦然純臣哉不佞嘗讀

河渠溝洫諸書終始西京二百年所治河不過能避河
害而已自用守番係言而山東之餉罷未有能引之為
利者夫以孝武之暴悍必罰而汲黯鄭當時塞瓠子之
決輒壞而罰不報其後使者王延世塞館陶金隄之決
功至微眇耳賜至秩中二千石爵關內侯黃金百斤甫
二歲而河復決大將軍鳳言之而不以謫延世及再塞
而復拜黃金之賜如昔彼其蠲罰崇賞視軍興令獨天
淵殊者豈有私故哉以河變無形而功不易也今公所

告成事不唯去河害而長有河利且天子坐明堂享六
服威無所不加而肺腑喉咽之地得潘公為之植公縱
不自名功所褒賜毋論延世輩又何下陶唐之於妣氏
哉不佞竊謂公之功一世功也其言借水攻沙以水治
水則百世功也聖人復起不易矣諸君試以賀潘公且
質之

送州學正胡小愚先生之淮藩教授序

胡先生之自鄴倅而司吾州學也甫一月而臺使之旌

至諸博士弟子相率而詣余乞言以贈余是時未能悉先生而姑以先安定之所以教吳興者期之又三月而諸御史之獎屢至無間牘諸博士弟子之頌無間口第其大要不能過二端謂先生工脩學官廢頒布束約櫛比網密則追列其郡政而意其足以當百里寄謂先生粲然文用邦君大夫所藉手章劄序記之類日益月新則推緣其經術而意其足以當六館選居久之先生竟擢淮王教授諸博士弟子愕相顧曰諸御史欺余哉其

所以旌先生何也而去為王國官夫豈一郡邑不足以當牛刀而最爾曳裾髀髀之是擬即斤斧曷施哉夫出先生緒藻飾三吳之黌宮尚有所不足而僅以一宗戚揖讓之大之不能發廣川之對次之不能授臨邛之簡而使先生嘿嘿以老何也或曰不然夫御史信先生者也銓曹者信御史旌者也今乃不信御史旌夫天下名為治平而好緣飾名為急人材而緩其要以故不能盡先生然豈亦以先生更宦久中有所不快故捨而佚之

耶先生第往矣吾嘗習空同氏書其父吏隱公名士也而教授王門十三年時時晦酒歌曰人欲為貪吏吏殃及子孫人欲為廉吏吏窮餓不得行我今既不為貪吏又何可稱廉吏王門之下可以全身避世是故居卑者挫榮者也夷俗者清質者也夫此優孟之所述而東方生之所托寄者也蓋未幾而空同氏出竟用吏隱公聞天下今先生不食酒時以文自娛而諸子之業空同氏言者四矣其何能終晦先生先生第往哉吾又聞淮之

諸侯王雅好士而以攝宗正條不輕為奇表之嚮縱未能發對授簡踰臨邛而望廣川其待先生寧至作左吳輩觀哉先生謝曰可以往可以毋往吾道然也藉如子之所期先安定彼豈假穹爵崇位稱哉毋問吾往問吾道可也遂長揖而別

送按察使顧齋徐公遷陝西右方伯序

當嘉靖中不佞以一乘車游齊魯而是時公釋褐而守泰安泰安齊魯大都會公斤剖理解其刃若新發於硎

而光攝於十步之外蓋泰安治聲籍籍冠東諸侯遂晉
丞吾吳郡而不佞已解事里居得以縱觀公之為丞丞
所任雖少簡於守而吾郡繁當泰安十倍公所操舍不
盡如其舊而斤剖理解其光攝於百步之外諸屬郡而
為一州七邑之吏民爭言丞而不復言守至相謂曰丞
奈何不遂守乎亡何公遂真為守庭之所受讞兩造大
小母下數百千人不崇朝而空之賦訟牘案滙為吏弊
庫藏出納稽為盜藪叢若山積滌若冰渙蓋公所措置

在咫尺而照及於幽陬蔀屋之下其筴在俄頃而惠成於數十百年之遠即亡論吾吳其環吳而為郡者三諸吏民爭言吳太守而不復言監司至相謂曰天子胡惜一璽書不令公遂有四郡乎而公拜山東按察副使徙鎮彭城吏民乃相顧歎曰公資高矣吾四郡不能復有公矣然公竟用他故忤臺得報調自是數躡數起者十五年即吏民未嘗一日不心在公而公以大叅行治邊吏民相顧歎曰公資益高矣奈吾儕望者何而公一旦

以觀察使仍行吾四郡兵事吳之吏士以及父老紅女踵相躡而出逆邇者郭遠者境之外至褰車帷而視之曰果吾父耶是毛且二矣而顏甚壯相率加額謹呼乃去當公之甫下車而吳大水所至成巨浸濡首之民强者持白梃而睥睨積藏曰吾曹旦夕鬼唯力之是視而暇計其它公第以一帑諭之曰縣官行賑若且有厲禁攘奪至斗粟以上立死民讀之曰公不欺我即死何以見公遂一夕解散而吳閭大盜故宿南北奸猾探赤白

九者十夕而九公至而俱帖然其請賑卹蠲省發下之雖
郡邑上之雖兩臺而公一人實幹持之每得報聞省可
輒喜動顏色以示人蓋公慈仁發於衷而動於表若此
不佞最後解鎮得復謁見公公剖藩籬去城府而出其
所謂青天白日者徐而察之則若含光承影之為刃其
芒盡歛而幾希乎不可覩矣公真變化達人也哉第吏
民之奉公僅一載而公遽遷為陝西之右轄以去於是
復錯愕相顧曰天子幸惠我公而又奪之何也且陝與

吳孰重則又自相解曰尚猶有開府在夫嚮者吾儕望公之為兵使者幾十五年而竟得之今者公位益尊資益積望益重是寧不可以歲月得也於是橫海濮將軍晨朝諸大校而問曰公去若若安所怙乎哉諸大校曰固也前公而使者色借我我曹才者得少伸而不才者因而有所逞其繼濕束我我曹之不才者戢而才者至今不得吐公衷之而後我曹始有怙也公今去我奈何則又曰尚猶有開府在濮將軍乃請於余求所以贈公

者余姑以吏民意答之而為賦袞衣之篇曰維茲竹馬
于江之澣將袞衣來母或狃汝若陝伯固周召二公之
所分理也公不暖席遷矣吾可母贅矣



弇州續稿卷二十七